

Estudiante di Universidad ta investiga ley di Curatela:

TRATAMIENTO FORZOSO DI CHOLLER LO NO TIN E RESULTADO DESEA

ORANJESTAD(AAN): -- E cambio di ley cu a haci posible pa chollernan wordo poni bao curatela, tabata topico di e scriptie final cu estudiante di Universidad di Aruba Edwin Duijneveld a produci recientemente.

Manera conoci, Parlamento a aproba un cambio

den ley na December 1998 cu a haci posible pa chollernan wordo forza pa sigui tratamiento pa nan adiccion na droga.

Pa por a skirbi su scriptie, señor Duijneveld a investiga si tratamiento forzoso di adiccionan lo tin efecto o no y tambe kico e posibilidadnan

y consecuencianan huridico di e cambionan legal lo ta.

E ta di opinion cu mester bin cu un solucion berdadero pa e problematica di chollernan pero cu pa haci esaki y mantene ordo publico y controla criminalidad, no mag di mete den bida di cuidadanonan adicto sin tene cuenta cu nan derechonan.

Pero te na e momento aki, e cambio den ley a drumi morto y pregunta ta si e lo haya bida algun tempo, asina ta... curatela tin sentido?

Ley ta bisa cu tratamiento forzoso ta posible ora un persona ta den peligro o ta forma un peligro pa otronan, contal cu e peligro aki wordo bon motiva.

E problema den caso di e chollernan ta sinembargo, cu no ta posible pa trata nan exitosamente pa nan adiccion sin cu haya nan cooperacion o den otro palabra: no por forza un adicto pa laga droga, e mes mester ta willing.

Esaki kier meen cu tratamiento forzoso lo no tin e resultado desea o en todo caso no e resultado cu comunidad kier.

Berdad ta cu e curatela lo duna e choller un cierto cantidad di proteccion pero e lo no resolve su adiccion y tampoco soluciona e problema pa comunidad.

Segun señor Duijneveld, lo

no ta mucho sensato pa trata di soluciona e problema di choller via e caminda di derecho civil y mihor lo ta pa sali di punto di vista di derecho penal.

Den su opinion, un ley penal bon poni den otro lo ta na su lugar aki den cual lo por sigui amplia e escogencia "cama o KIA" cu un adicto riba caya lo mester haci na un dado momento.

Si en berdad gobierno kier traha na yuda e chollernan, tin cu cuminsa traha na nan rehabilitacion y nan re-entrada den comunidad seriamente y pa esaki lo tin mester profesionalnan, tempo, placa y facilidadnan adecua.

Te na e momento aki, no tin suficiente profesional pa traha na rehabilitacion di chollernan mientras cu e interes pa inverti placa tampoco ta parece di ta biba mucho, asina señor Duijneveld a ripara den su conversacionnan cu hendenan cu ta traha den e ramo en cuestion.

Ministro di Salubridad Publico, dr. Ike Posner:

ARUBA LO HAYA UN APARATO PA DESTRUI PIEDRA DEN RIÑON

ORANJESTAD (AAN): Ministro Posner, a duna di conoce un bon noticia, esta cu Aruba lo haya, seguramente final di februari, un *niersteenvergruizelaar*. Esaki ta un aparato cu pa medio di laser ta kibra e piedranan den riñon sin bay over na cirugia.

E adkision aki ta un muestra mas di e maneho di Ministro Posner, esta di trece diversificacion y mihor servicio pa nos hendenan. Un muestra palpable di esaki ta e Aruba Heart Institute, caminda despues di negociacionnan pa 3 aña, a logra di trece un tecnologia asina moderno pa Aruba dunando nos hendenan cu tin mester di un diagnostico e posibilidad di hacie na Aruba mes.

E *niersteenvergruizelaar* tambe tin e mesun intencion. Hopi di nos hendenan mester bay den exterior pa sigui e tratamiento aki, pero awor nan lo tin e opcion di hacie na Aruba mes.

E adquisicion aki a resulta di ta uno ventahoso, pues un aparato asina, completamente nobo tin un valor di 2.6 milyon Florin, mientras cu debi na un fusion di dos hospital na Hulanda, un di e *niersteenvergruizelaar* a keda na benta y Aruba a logra obtene na un prijs di Afl. 50 mil. Intencion ta pa capacita diferente di e personanan di SPRA, esta e fundacion di pacientnan di riñon di Aruba pa por traha cune, pa despues e mesun asociacion aki por maneha e *niersteenvergruizelaar*.

E opcion aki ta uno ventahoso

pa tur hende pa diferente motivo, pues si SPRA maneha e aparato e fundacion lo tin su mesun entradanan y lo no mester ricibi subsidio for di Gobierno mas; tambe ta existi e opcion cu lo por ofrece un mihor prijs y a la bes duna un mihor servicio, ya cu e pacientnan no mester bay ex-

terior mas pa ricibi tratamiento.

Ministro Posner ta conta cu den futuro lo por conta cu diferente otro aparatonan di tecnologia avanza riba tereno medico pa asina por ofrece nos hendenan y personanan di region mas posibilidad den cuida medico.

FUNDACION CUIDA NOS AUTONAN!!

